

四庫全書

集部

欽定四庫全書

集部

文忠集卷十二

詳校官庶吉士臣范逢恩

侍讀臣孫球覆勘

總校官中書臣朱鈴

校對官原任編修臣勵守謙

賜錄監生臣杜文海

欽定四庫全書

文忠集卷十一

明 范景文 撰

詩聞鶴草

偶過王君繩山莊聞其庭中鶴唳

不因聽鶴出無意得相聞水際偏能遠風中迴自分立
應依瘦石志想在高雲便欲尋聲入名香坐對焚

齊中

素嫌多事是尊生但得心閒近道情韻取疎梅寒可耐
形摹瘦鶴病逾清掃花欲便觀苔坐刪竹常防礙月行
片石顏然無位置任同老懶畏經營

山園將闢濬得一泉甚甘

何須他選勝隨意得佳泉石氣如將雨花畦漸及田烹
茶澆苦月繪雪借寒煙時與松濤并聽秋坐檻前

贈米仲詔

石氣將人養煙霞舉體生何須除絞冕自不礙孤清勝

跡矜遊具公閒付冶情微嫌粘帶處畫品並詩名

仲春三日同孫公燦李仲昌王彥升袁慎修康

用舟王德啟遊適園晚歸

花時不必有花開但得乘春便上臺畧彷江鄉還曲水
欣逢勝日絕纖埃爽生夕氣雲侵坐韻雜風聲鳥勸杯
踏柳人歸妍在影漸看斜月下城隈

味元堂預衍元宵二十韻

有引

中秋之勝以月元宵則兼燈色光之撩人者

此夕為最他節令不及也盡人一生止得百年除却穉老堪足攬結此趣者不過五六十耳而憂患病瘦陰雨薄蝕常又半之其得開口歡笑與月色燈光兩相酬對蓋亦無幾矣余妄擬自四月至九月皆作中秋曲臺空林長橋短舫以待月自十月至三月皆作元宵坐煖閣華堂耑理燈事一切桃艷荷香梅芳菊秀雪風水竹都借為此中妝綴昔人云一

日當兩日活百歲便是二百歲若此歲歲推
衍何啻幾百十遭所謂能轉時而不為時轉
者也月必會會必詩主之者余與仁常而往
來無常客經始則甲子仲冬望前一夕也
何須元夕至月好更張燈節令人能行心閒興可乘留
清刪火樹懸照映壺冰時趁先齋夜人招有髮僧小巵
明綠玉軟綺拂青綾釀雪宵微暖凝寒焰自澄水沈清
霧散墨暉霞蒸梅獻探春使松邀耐久朋形忘呼爾

汝語次戒除陞觴政科條減歡場伎俩增歌先神静妙
鼓盡氣憑陵宗案疑難掃詆言笑莫勝吟參東越嗟儂
借北吳稱茗戰分高下騷壇嘆廢興調排名士簡端坐
酒人矜抱杞憂天墜呼嵩祝日升是日聖節醒多聊間睡迷
苦更嫌兢後約需花放臨高帶雪登事皆離舊譜詩并
就新繩佳集無嫌數中秋定可仍

聽李山人彈琴

無言先有韻竹下坐彈琴忽爾清煩想淵然思正襟聽

泉來石上引露就桐陰曲罷還疑續空林對語禽

秋夕偕仁常汎舟慧上人適至同飲候月

秋遊宜淨侶忽漫却逢僧韻朗人堪畫言清齒漱冰屑
光從水起酒力仗茶勝懶醉通禪意學參轉葛藤

秋柳

葉落何如弱絮顛總來易惹是風前衰容故弄新黃色
悞作春條一樣憐

七月十六日夜邀仁常暨諸子看月語次預行

中秋故末及之

雨自今朝霽月仍昨日圓邀明看怪石味酒想名泉歡極能忘病醉來亦類禪中秋輸此賞荷露正娟娟

歸

素衣生怕染京塵乞得江湖老此身無用將從樗櫟伍有家願與鷺鷗鄰陶潛避世非為菊張翰思吳豈在尊夜月幾迴勞北望關心國事涕沾巾

有感

天啟嗣祚年海宇邁大慶朝廷欣有人臺諫氣色盛呴
闇灑赤肝指奸節逾勁危明寧不過恃有上神聖何來
連斥逐無乃累新政薄謫亦主恩敢廢天子命所虞端
一開凡言疑欲屏中璫思乘墉况可授以柄於惟我神
皇高拱飛天鏡稍稍視下輕釀成結轘病今誰秉國成
借之弄機寃罪人佚顯罰乃曰言官諍漆室抱深懷能
不心炳炳尚慎一怒加撫茲萬邦正

倪玉汝太史見過留飲瀾園月上泛舟得一先

韻

匪係神交定在先
忽忽那締此奇緣
秋逢爽候隨開社
舫載名流便擬仙
取醉猶存清者聖
稱詩不避野而禪
醉餘試共商茶事
覓得新方好洗泉

昏黃月暉蔚藍天
高柳垂堤緩放船
將我入雲唯冷語
如君對酒總枯禪
和歌蛩韻商為調
依水荷香晚倍妍
不問知當游濟上
筆濤滴瀝響寒泉

玉汝時有
歷下之役

秋雨送琴客

推琴還徙倚似欲問歸舟裝就藏雲滿行先借雨留分
題當贈柳惜別正悲秋一片瀟湘意途間按譜汎

病來八越月矣起而口占

似經月度幾迴圓病鶴相看共黯然少間借題仍謝客
劇時絕念擬逃禪累心未盡留詩債檢箇還羞問酒錢
小醉猶思騎健骨時扶瘦影立花前

紅樹

作意看紅葉遊時定趁秋經霜初就染映水益能幽艷

護藏風樹光寒載月舟隔籬黃白隊爛漫莫相讎

病起聽歌坐中約以茶賞適仁常寄詩相訊即用其韻成詠

耽病因詩總是魔破除獨借幾廻歌醉聽易惹閒思緒
茶韻銷來試若何

每至闊情喚奈何茶顛較酒不爭多曼聲怕到銷魂處
雅譚從將換艷歌

憶山

憶山偶得句多半是言秋煙濕林光醉涼生竹韻幽招
雲時掃石見月或登樓准擬寒梅綻還成度雪遊

禮佛

坐對寒冰冷熱腸試將消息問空王翻經手浣薔薇露
禮佛心澄菡萏香累少全家修淨土悟來立地得慈航
安禪容易難持戒時向花前覓酒方

留未央仲昌小飲看銅雀瓦研

每當苛禮似相讐言小聚寧嫌草草留病遣有方先破悶

趣多無處不闊愁酒花浮玉腸生雪茶韻吹蘭氣帶秋
一片英雄身後瓦摩溼淚共墨光流

客有詢近狀者書此以答

若問歸來事閒時手一編饑臨乞米帖貧乏買山錢鶴
性如人傲花枝近水妍猶容吳客至語帶五湖煙

對雪

月下宜脩篁風前宜新柳兩清誰相宜梅以雪為友孤
山移數株鐵幹矜希有無雪少精神如人失勝偶情深

喚奈何枯坐相待久天似殊作解吹竅灑疎牖倣古繪
雪堂細於影中取明滅幻冷光往往因畫手就旁寫凍
枝以配支離叟徹骨耐高寒雖老不嫌醜元賞愜素心
宜茶不宜酒

病起對酒示未央仲昌

准擬歡場病稍寬當筵緒亂轉多端國憂無力仍謀野
生計全窮早厭官烈士神鋒何太雋清人腸胃幾曾寒
誰能遣此銷惟酒可奈茫茫取醉難

冬至留未央諸君小飲余時有亡友之痛未央

亦久客思歸故末及之

病餘節序幾相忘坐到情生漫舉觴雖在醒中闋醉趣
每臨歡處動愁腸憂天自覺心逾短測影誰知日漸長
夢苦勞人常畏睡不分感舊與思鄉

味元堂

留將何物伴元亭瘦鶴腳仔隱士形傲骨相看延石丈
閒功好與註茶經蒔花亦欲成經濟餌木兼能益性靈

道是臥遊嫌多事從教飾壁畫空青

與朱央坐古香齋鑒諸供具

元賞無闕好事家嚴中取鑑意微奢摩挲朗玉靈人氣
指點微斑辨土花水寫湘函晴作雨杳凝芸架夜生霞
難消兩腋清風甚又煮寒泉點碧芽

魏武疑塚

銅雀臺已荒英風起超忽西陵秋草外高墳立突兀抔
土非無情千載難銷歇遺香散空原行人步明月虛塚

七十二未埋英雄骨魂遊夜歸來自疑無處歿四目兩
口人分身臥靈窟何不壘壘間題遍漢相碣

留未央未央家有湘君閣時寓大乘寺閱月

暫除名理覓新聞細剖生香坐對焚語授仙人還破戒
嗜偏古物更深文禪棲倦臥何妨懶茗飲清酣亦類醺
待雪中間情可耐無勞遣夢到湘君

仲冬晦日仁常送迎春花至即邀共賞

夕照流窗映薄紗披風竹影妙歌斜當寒故暖將為雪

未臘迎春早放花雅節和譚敲響玉清供佐酒剪芹芽
坐拈宗案重重掃耳用聞香鼻味茶

瞿少潛見過留之味元堂有作

煙霞片片染衣裳拂塵手提坐隱囊似記前身工作畫
懸知去後坐留香杯生淺笑花浮面曲度深宵月過廊
我亦一丘耽夙癖入林雅事細商量

程肖義惠菊

東籬分得幾叢花映緩秋容爛若霞淺月枝移間取影

斜陽坐對靜嘗茶
省將掛畫香仍勝饑
欲餐英韻似賒應景無人能送酒
清寒猶自過陶家

臘日郭伏生來自敬仲所留飲味元堂同王貞

伯

思對梅花發重來
得友聲人如彝鼎貴語帶水山
清酒較泉逾澹燈因雪倍明
聽歌懸別賞微處想詩情

漫興

槿籬逕曲幾迴穿屋廠軒窓
別一天供石全臨倪畫法

浣花亦取惠山泉香熏紅袖安禪榻月引緇僧上酒船
清事將無成溺惑因空俗韻便名僊

詩 留都稿

中秋無月

非貪明月好不願值中秋移就燈前照思從鏡底汎雲
香花唾影波散雨吹愁懷此清如挹還堪作夢遊

壽陳眉公徵君用董思白韻

無論蒲駕與鸞驥懶出僊廬歲已三避詔洞今移泖澠

老人星獨照東南露花歷歷飛毫彩霜菊纍纍韞手談
何日解弢求辟穀道衣相訪拂烟嵐

恭閱陪京宮闈次王元美韻

帝闕昔經始匠作亦云備淮甸擁那居鍾嶽奠宸位虎
踞八表從輦飛百禮寄宮水紅壁流苑花綠旛麗結佩
趨辰朝鳴鐘候更次車書既已同齊居順星氣儉德神
禹同卑宮符規制輦路長松風香隨秋月至

恭謁孝陵有述

惟帝造家邦棲神依江甸本計繫東南基立聯寓縣牖
戶莫予侮咽喉席清晏攀鬢泣難從藏鼎垂鍾獻光氣
照松楸萬年紫氣現絳帷頓八紜除克與定變會朝既
清明長發真龍見南顧思無斁濯靈此永奠臣職愧軍
旅敢從俎豆薦

閱江

長江浪湧石頭高雄矣王師壯羽旄閩外無人為埽幕
軍中何計可投醪乘風貌虎堪摧陣落日蛟龍欲撼濤

擊楫中流思百折宵衣鐘漏正焦勞

祝太蒙尚璽宗兄時為閏四月

春流餘閏雨花明介壽長延夏氣清水木自吳天衍派
璽書專尚月為卿同人應語偕憂樂獨往寧堪滯釣耕
聊選江山娛此日白門楊柳正藏鶯

秦淮

三月秦淮上新鶯代管絃柳春全拂水花夜欲藏烟陰
霽虹雙掛淋漓酒一天風流餘此地莫認永和前

壽周挹齋相國五袞時為仲冬

綺歲功成帝者師浣花溪畔隱仙姿正餘日月懸青嶂
猶有雲雷繞赤墀爐煖博山藏舊賜梅含霜圃長新枝
佇看紫詔蟠龍卧泰際陽回此時

四友齋齋宿

老松翠栢綠陰古時聞暗香隱梅塢新篁迎雨嘯碧雲
夢入山陰千尺頻度梁乳燕驚蟾蜍螢星飛盡墻陰舞
穆然靜慮休空竅百王禮樂循簾幕咫尺聲靈鎮舊邦

遙望閟宮思桑土干雲勁節洵良朋好手調羹為溉釜
我戰則克祭受福庶以恪恭報明主

靈谷寺

小隊衝寒路不喧長松影落給孤園迎風十里旃檀氣
負郭千家古雪村靈月自生空谷底暗泉環漱半山根
到來未敢窮遊目時亟方嚴鎖鑰門

黃公讓垣長以言事去國

龍門正氣接天都抗疏高名壯伏蒲獨以時危鳴仗馬

不因秋老憶蓴鱸熙朝終是霜霆重幽夢還將日月扶
世事正須同擊楫競傳江左有夷吾

壽許子洽

寥天孤鶴翥雲翎高士於今見典刑字飽神仙靈蠹簡
書藏石室續麟經董狐筆不寬時貴司馬名先動漢廷
陵谷幾更君未老老人星傍少微星

暇辦亭落成

雄都開白下重鎮寄師中天作高山仰地環二水通鐵

花昭舊服金匱襲遺弓機務分宸北綢繆控大東裘輕
思宴鎬圖覽識詒豐六代風流地千秋日月宮但存高
士意期與昔賢同鎖鑰慚司馬風雲想卧龍治絲須取
暇聚米快成功了此無多事於斯竭匪躬捷書來賜墅
猛士憶歌風氛靜安甸服時平燕帝穹登臨籌豫勝月
帳夢非熊

朝天宮即冶城山

冶盡人間世蠹然存此宮廊迴斜落月鐘老咽秋風靈

氣星壇護香煙御座通如聞山作語萬壽祝無窮

登燕子磯

天地從來峙此磯驚濤欲撼石崔巍長江自昔稱天塹
一水於今壯帝畿雲鎖蛟螭瀾自倒山蟠龍虎脈相依
上流形勢操全勝隔岸休傳羽檄飛

天界寺

塵外何從覓淨緣偶來法界叩諸天經聲度水魚能聽
樹影參雲鳥自翩地靜寶花香作雨陰多松月夜為煙

慵將餘慧需牙後半偈還期四大捐

賀京兆王元珠擢廷尉

南國棠陰借保釐功成雷雨慰黎夏時未肯忘桑梓
治內尤須問棟棟泣罪湯仁寬一面祥刑呂傅重三推
臨岐別有榮愁緒欲誦崧山補袞詩

賀李含真晉司農

鳳詔新傳自九天秋深花共綺雲妍繭絲憂切監門繪
箸借風清紫塞烟萬井恩波霖雨潤四朝元老地卿賢

冰厨釀得芙蓉露重挽行鶗醉別筵

登雨花臺作時偶聞警

香臺環舊刹踏翠上逶迤烟草六朝意春風三月時城
規開甸服江線劃天維極目烟塵起臨高漫賦詩

莫愁湖

莫愁湖上酒樓前露荻烟葭間渚蓮一代風流披錦夜
四時芳氣蔚藍天

半欹山碧帶秋波柳岸樓臺掩映多水鳥相呼飛不遠

憒聽人唱石城歌

鷄鳴山

壁削高城寺帶山雲寮丹舍見漁蠻波光照映湖為鏡
樹色青歸霧作鬟諸象疑從空際幻一官忽覺去時閒
殘陽未下東生月無盡光中自往還

壽官凝之母宋恭人七袞

幾許明膏聽喔咿代嚴成教兩名齊鷄鳴每肅星壇禮
布素恒兼象服攜脫髢真稱名士母長齋不愧太常妻

楚烟綠處春風起吹放桃花遍五溪

送唐損占祠部出守歸德

夏寒江漲水平天
花映朱旛草色鮮
舟楫濟時新五兩
威儀行部舊三千
兵銷渤海人驅犢
雲吐中嵩地湧蓮
露冕懸知澤自溥
隨行霖雨遍周田

題翁漢生園

震澤湖中第一山
山中別有一人間
園開透水峯峯出
花斷成蹊樹樹灣
海氣生烟樓閣敞
書燈徹夜酒盃閒

還聞光祿神仙去不待千年化鶴還

題陳幼白石浪閣

蜃波吹不爛碧浪結幽紋相對無一事秋濤時可聞
遵海忽南來潮浪接紫荇入夜夢寒光虛察涵素影
枕流與漱石共此靜觀中高閣貯雲氣將無性所同
不學乘桴遊却為鞭石計憑虛招米顛花浪霑清袂

贈三昧禪師

道是宗風盛戒居定慧先看花飛作雨聚石擊無烟堂

上三車法燈前一指禪往來乘願力大地擁金蓮

秋杪二日招諸友集靜遠堂分得門字時扈芷

天游二上人新至

共挹高秋色茗杯遠意存橐雲來古澗繪雪艷岸花
影當風亂歌絲入夜繁禪參清醉裏聽曲莫銷魂

壽邱太安人為楊計部母

鸞珈色映綵衣新櫛悅曾隨骨鯁臣教化鯉庭勤社稷
邇來熊夢叶天人潘輿晴日花堪賞陶母官厨性愛貧

見說冰心兼露灑南天競祝北堂春

戊寅初度喜雨

冬燠知將雨應期此日陰春先梅意潤爽入酒盃深滴
瀝寒歌韻雲雷激壯心感時才易盡漫自說為霖

落梅將殘有作

花事亦何與人事不禁開落自闊情雪中欲盡寒梅影
留取殘枝待月明

賀李少文

鳳毛代起重明光 御筆新分多史籍
霜暫爾鳴珂 嫫禮樂還看策馭問津梁
褰帷日映寒花麗 感事愁同鴈字長
尺五恩章暉帝里 應知諫草映縹囊

再壽太蒙宗兄

狼山青葱海雲薄 真人嶽降鯤鵬壑
伊昔我祖宦海陵 丹穴一枝才焯爍
冰心蟬蛻薄專城 博學追隨漢五更
十年郎署芬時譽 起部風清水鏡明
鰻鱣卿雲奉帝璽 翩然拂衣謝青紫
卜築巖阿依白門 六代風流偕卧起

仙風飄渺生春姿
耆英高會浣花時
幸附墳築進醞醕
觴蒲好咏大椿詩

春日登雨花臺

山光一帶正迎人
選勝高臺載酒茵
綺席閒分鋪草坐
香塵似裊散花身
晴烟破曉青堪譜
淺黛描春翠可親
鮮縛勝情還不礙
披雲雙屐試遊新

三月遊攝山作

山寺春雲護披霞
入漸深品泉移谷口
選石費天心磴

轉江能近林空月不沉無生吾欲證靈藥懶重尋

遊牛首山時方解官

看山雨後清於洗天闕遙臨翠可分恰對峯嵐如欲語
此來猿鶴免移文塔移影轉因迴照磴引身輕恍入雲
坐定聊參火風義空香何處覓聲聞

高座寺

綠雲遮斷寺邊扉如寄閒身向此歸山月每窺竹影瘦
松風忽瀉茶聲微人來如共雲分座詰久偏憐翠上衣

坐破蒲團無是處眼前爛漫逗禪機

沮風夜泊

橈停月落暗江灘何處吹帆夜未眠
自是隨風儂不憒乘流莫怨下來船

壽薛十俤八袞時寓白門

少微星曜謝公墩祭酒羣推白社尊
筆下六朝供帶草眼中四世見芳蓀
朱紝愛譜清平調綠雨欣霑綺李村
夜讀仙經和鶴嘯慢亭煙月接崑崙

送葛震甫歸洞庭

夏寒新漲碧漸流雨灑別筵感易秋
敝篋千篇存故業孤筇萬里侈奇遊
清風滿袖無餘橐烟水當門好繫舟
同是羈人先送汝愁深忍復說離愁

祝何芝嶽相國時為嘉平月萬壽前十日

補袞功成日月間賜裘紅膩映童顏
庭栽玉樹娛清晝藥採芝田養大還九鵠
猶存黃髮老一壺肯許赤松閒岡陵恰祝嵩呼候南國仍看北闕環

立秋日錢與立諸君送之廣陵影園月下聽歌

次鄭超宗韻

恰當勝地又佳時暑去人來月與期空水亭為開面目
新秋柳亦競腰肢園摹畫格形生影妙解歌情肉并絲
囑語蕭蕭翻別調登臨無事更傷離

予與方書田相國同時被放舟次維揚飲文昌

閣

艷說聽濤正及秋烟波一帶望中收鶯花逗夢生閒恨

烽燧闊情蕩遠愁去國何妨聊問酒思鄉無奈只登樓
閒身并荷明王賜避世相將訪十洲

己卯九月杪再遊攝山遇雨

筭輿經雨倍逡巡虛想秋遊勝似春却對烟雲如畫裡
入山仍作卧遊人

與一門上人白雲庵共話即用其韻

閑心與山意秋際更相關因雨增蕭颯有僧澹往還雲
留翻礙寂鳥過總歸間揮麈通頑石無言并可刪

白門重晤劉相國舟中共詰

霜深黃葉滿秋山相對江頭各解顏四海無家經亂後
一身盡瘁憶行間法明始欲求疎網主晤何難立賜環
去國孤忠懸九廟金縢啟處絳車還

歸舟暫泊京口

空航亦號五湖遊勝地真堪與唱酬唯許卜鄰招隱地
三山雖好憇淹留

登焦山

一棹凌波陟翠巔。潮生几席恍疑仙。
山青忽斷雲沉守月白遙連水際煙。
瘞鶴空閒銘石壁。盟鷗應許話江天。
洞稱避詔令猶指。道是逃名却更傳。

遊金山寺

萬頃波中獨占天。客帆日夕望蒼烟。
過江車馬勞塵刦。繞寺魚龍穩晝眠。
喜抄詩添墨。揭佛來香國。
記桑田一拳已自涵空相。何必安心問了然。

賀茅止生舉第三子

荀家才妙誕慈明蹀躞雲駒類所生舊業留存銅雀研
賜袍剪作鐵花網已知瑞國徵三索但祝成人享太平
河朔恰逢消夏會歡傾百斗故人情

庚辰閏元旦作

天心重起貞元會月紀春王序不窮爆竹無聲融曉日
冰花盡泮漾條風夜忘守歲新人意瑞再占雲費化工
最喜太平頻獻壽椒觴又進未央宮

閏元宵作

閏來猶自喚元宵燈事重重意亦驕影粲星華梅盡綻
烟清火樹雪全消傳柑盞更溫前月踏柳遊還憶昨朝
天似多情人并韻春深恰好試輕綃

閏元夕同茅止生諸友雨中聽歌座間偶談長
生之旨客有以占候家為是月不宜閏者故
并及之

常期計已過花朝因閏稱元再此宵燈焰明因離月暉
歌情妙不借笙簫駐顏酒當三千核取景人疑廿四橋

贏得百年剛一遇憂天無事問層霄

同方孩未王子雲及支浮諸上人華山月下共

談

參禪何處問宗風欲斷聲聞棒喝窮香散空堦花自寂
誰留影印月明中

壽南少司農畢東郊老師

法星曉爍映長庚鍾阜遙看五色明周召大猷勦武烈
東南元氣翠陪京泉流九府心能計天柱四維手可擎

歌罷岡陵還進酒綵山恍聽夜吹笙

題周江左鼎足齋齋中所貯書畫古法物

結廬人外意蕭然香國翻成小有天四壁忽生空翠濕
千秋如見墨痕鮮摩挲金石人俱古寢處縹緲夢亦仙
共我於中成鼎足坐來誰羨米家船

送盧德水漕使於京口

奕奕丰稜朗邁雲澄清頌更滿江漬霜飛銅墨驄堪避
疏繪流亡草莫焚齊魯名咸宗泰岱東南士盡仰河汾

明朝揚子仙帆渡遙向三山挹紫芬

立秋前四日同諸子秦淮夜泛計二十年再續

此遊感慨係之分得霜字

桃葉芳遊夢未忘廿年迴首嘆流光秋將啟候月先好
花與為鄰蘋自香漢漲聲如聽雪瀑詩成字欲挾風霜
鷗盟長訂秦淮水一棹漁蓑岸柳傍

送王子雲歸楚

人道愁時我亦愁秋風江上送行舟孤高懶上春明賦

慷慨能抒國士籌蓬底正堪題雁字酒家到處典鶴裘
欲過湘水懷明月應憶秦淮古渡頭

途中見紅葉用少章韻

曲曲寒塘點綠蘋霜林遠映倍精神
精神炤來光影宜朝日
別已經年見故人黃菊為憐依晚徑
青松獨許作芳鄰
遊人試試看花眼冷艷秋容自不貧

送太蒙宗兄還海陵

臨岐執手意躊躇秋老還歸海上居
桃葉寒烟留拄杖

白狼翠色點衣裾
粲英正及尋三徑
揮麈相將伴六如
我亦倦遊思避地
卜鄰蹤跡溷樵漁

贈朝宗上人

心棲空不住意色更軒軒白鶴雲間出青獅座底翻談
令龍耳聽定起石頭言暨拂開諸義天花夜雨繁

寄懷倪玉汝太史

西湖感舊夢中過橋畔秋容近若何攜奕山頭皆謝墅
扣舷月下譜吳歌星躍太史藏書麗潮湧錢塘得氣多

可憶白門孤嘯者江風蕭瑟嘆庭柯

贈鉉沖晉少司寇

帝德好生意已宣
舉陶新簡衆欣傳
白門雨潤膏滋泰
園土春生火長蓮真佛心慈能度世
仁人力大可回天
覆盆行望朝暾色
矯首鄉雲在日邊

送方爾止傳經蔡兵憲幕中併司記室

柳澹風柔草色欣
春江帆影映斜曛
從戎自昔推才子
辦賊於今屬使君
劍氣宵寒星斗動
書聲曉動鼓笳聞

聖朝頓網旁求切奏捷先看露布文

春日同雪嶠上人遊瓦官寺

廿載流光嘆擲梭
乘春無意復相過
清陰不改留孫竹
老樹曾經挂女蘿
故歷刹隨陵谷
易境幽香雜雨煙
和坐來試證無言
諦止水何須問定波

送汰如返吳門

高坐談經響法鍾
又看拂塵問吳葑
懶殘煨芋迎寒月
古德歸藤伴老松
弟子教成香作雨
維摩健去舌無鋒

楓林已訂重相訪花路禪關莫便封

送杜開之都督鎮浙

漢庭秉鉞重嫖姚上將輕裘不擁貂鈴閣已清南國紀
雕弓欲射浙江潮樓船雪霽飛雙纜健馬烟寒駐六橋
遙憶旌麾移鎮日西冷月照鐵花袍

送雪藏上人將還匡廬

未識匡山面逢師似已經雲巒光在眼筆墨性能靈言
下三乘法圖中五岳形倦遊何處去風雨路冥冥

送李少文按閩

霜花肅氣秋九月紅如茜送子馳青驄丹山水飛練頻
行重握手憂時心悄悄烽烟震我圉繭絲悲赤縣誰為
柱東南濟川藉手援海邦幸無塵時恐妖氛見水鏡澄
官方繡斧彰雷電封事策金城攬轡巡夏甸庶以荅焦
勞入對含章殿慎旃似爾祖崇勲懋帝眷

秋杪登安隱寺後山小飲適余築精舍額曰萍

菴因以萍字限韻

節過重陽秋易老霜花著樹映山青妙高臺望人皆
蟻雲物波流室似萍選夢聊分僧榻卧徵詩借作梵音聽
情多易感誰能醉莫怪三閭嘆獨醒

春日遊仲茅爰園

夙約今方踐期春故爾遲石猶存雪貌柳漸逗烟姿鳥
嫩聲能和竹多徑易疑韻留歌盡處酒半出新詩

樂事應非一清宵好放船窻開緣月上岸泊定花前穿
谷工疑鬼迴溪別有天為歡愁漏短明日隔風烟

送周挹齋相君再召

絳車花擁草烟和海宇風傳盡舞歌輔弼星明銷孽弟
岱宗雲出灌江河功銘鼎釜書今續玉稱身腰髮未皤
從此杞人無過計補天曉看五雲多

雪嶠禪師見過留坐將還徑山詩以留之

秋原霜色懶招尋鶴引高流入徑深茶醉酒醒難判斷
身真世假任浮沉參禪并入刪元語聽曲翻能長道心
行脚無須商去住心空何處不雲林

壽王季重石夫人六袞壽

林下高風女士行
名人絕代影相將
篋餘布素隨仙吏
夢發蘭闈育國香
鳳翥雲中風正飽
花明雪後日初長
齊眉笑對佳山水
歲歲絲衣進紫觴

張九山給諫言事被謫

丹翰戾南國矢音曜
奇姿梧掖肅秋霜
東節陳危詞狐
鼠已魄阻憑城安所施
天意神顛倒吾道無詭隨瞻彼
高岡翩何妨暫枳樓
君子司邦直卑飛亦光儀中誠苟

不昧剖衷對龍墀嗟余抱孤憤慷慨共心期

壽方亥未年丈

秋花寄靜枝幽妍入蓉帳霜氣肅萬物孤松發條暢君子古處心堅於九節杖狂流升推遷末俗懷嘉尚吾道賴主盟騷壇亦宗匠略寄安石基量傾次道釀相看雙髮元閒情悟昭曠冰雪神仙姿湘波瀉清漾藥圃菊苗肥楓林紅葉颶何處託遠心古衲互酬唱黃梁夢發醒

百事任層浪

送成寶慈侍御言事被逮

景運麗中霄階扉翳重霧大道忽淪夷疏稗茂嘉圃抱
葉秋風寒獨鶴揚清唳昌言排九閭口誅振末步未憂
天聽高恐為先聖懼倫彝既大明生死何足顧陽德正
方亨豐蔀莫能錮風雷感帝心昂首驥皇路君子勗敬
身同心要主悟莫言虎噉人相戒公無渡

去國辭陵忽大風雷

曉望鍾陵紫氣開五年拱護愧非才狂愚有罪臣應死

高厚無私怒易回帝鑑自能明日月孤臣敢訖動風雷
去天灑淚重迴首何日烽烟靖九垓

聞黃幼元繫釋志喜

雪霽春風遍草萊羣臣繫釋日邊來堯仁又見三言宥
湯網今看一面開廟社有靈深呵護聖神獨鑑自昭回
太平應卜天心轉海宇歡聲動若雷

壽姜漢洲封君六袞雙壽

夜讀靈文曉弄潮齊眉白髮未飄蕭古心映物存三代

佳致移居愛六朝世望門高東海表國材梓象北山橋
長春酒進還難老蓬島仙人近可招

煙霞載為錢與立題

瀨氣蕩空明一棹如浮梗竒當無窮詣溯洄人外境夢
出水雲間風雨皆霽影扣船者誰子卧遊悟閒靜不載
石與書恐為空明屏日月吹逝波縱心以相領恰得片
片霞澄懷對三景

涂德公疏救黃幼元廷杖尋奉詔釋於其歸也

作此以贈

未回天怒雪霜紛灑血陳詞呼帝闇任憇久能容汲黯
免冠故敢抹朱雲風傳太學旛猶立名動宸旒草莫焚
盛代即今寬黨禁好將厨俊報明君

曾聞逢比犯嬰鱗今日天留不死身噦鳳欣看來草野
寒蟬足可愧簪紳千秋義激闢師友五夜銘心泣鬼神
持此孤忠知不變登朝只願作良臣

贈黃止子宮詹幼元猶子宮詹被逮時止子隨

之至都周旋其難詔釋同歸作此送之

淑景曜靈晨習習煽谷風陽和回大地柘萎發昭融君子秉危節蹇蹇矢匪躬快覩風雷感不待啟金縢憶初當未霽轉擊震高空見聞皆避匿跼蹐懼莫容阿咸文弱士氣乃燭長虹駕衣效橐餧生死等毛鴻一掬悱惻意誠至自感通整轡回巾車何用嘆不逢皇路向清夷穆穆達四聰拔茅符泰象壓陞俊義同屈伸有定理從來若張弓去去勿復疑吾道無終窮

送楊伯祥就逮入都

黨人碑石聞已碎何復驅車泣草萊鶴禁還須資頗牧
鑾坡豈忍棄鄒枚昭回日月懸清照顛倒風霜老幹才
此去應逢宣室召綦蕪吾道待君來

甲申殉難絕筆

孤臣空灑淚天步遂如斯妖蝕三光暗心盟九廟知翠
華迷草路淮水漲烟澌故國千年恨忠魂遙玉墀

文忠集卷十一

欽定四庫全書

文忠集卷十二

明 范景文 撰

簡牘

與吏部曹仲參

再啟不肖某自奉命以來律之不宿家之義即當趨
裝北上第家嚴初旋情闋舞綵依依子舍弗忍遽
出擬欲遲至仲夏不知可否謹以請之台臺

簡鹿乾嶽

一寄書問忽忽半載餘矣爾時幽憂沉病猶能強起見客數月以來彌致削損漸成不起之症雖復裹藥為飯日四五劑而刀圭不靈支離如故總緣哀劇傷心一遇感觸輒嘔血不止病在本源非藥石所能奏效耳前仁兄曾苦口勸我切切引身經之痛為誠心知相愛之深而悲從中來不能自遏每念古人滅性比於不孝亦心知之而一時難已今追悔無及也然伏塊之餘未

忘憂天當揆何人國事能堪敗壞耶憶已已我輩在
長安議起高陽公為旋乾轉坤作用今舍此老未克
有濟曾詢同人漸漸得此機括仁兄閒中幸一勸駕可
為蒼生出乎

與李性叅

日者得書情至可掬也癡人徹淡於時事未能放懷家
居深僻如坐甕中寧不悶絕茲特遣介遇有緊要即
令馳來相聞如敝門人孫興公者亦可以聞見助也

與友

豐芑舊都鴟借斗山偉望乃主持清議表正官儀中外皆仰丰采焉今者績奏彤廷行當揆留散座二十四考其始基之矣聞以便道錦耀里門遠近傳為盛事某睽違日久依戀彌深即欲趨申賀悃并道濶悰而病體委頓不能奮飛謹此遣役代叩附以芹將伏惟鑒涵

復徐思健

別經半載相思為勞偶以李生之便特借作郵因訪西
席故薦左右其實此人止可為師非為客者比弟近病
體纏綿藥不脫口醫不離門而猶無起色神傷之餘一
時固難驟愈每自循省殊有性命之憂今惟勉自願
攝粗延殘息以守先人墳墓此外絕無他想日前廟堂
急欲料理已作書止之揣分量力為櫟椁自全計非矯
情好高也荷厓注之殷輒以近狀奉報念年翁榮問休
暢遠邇謳吟運事告竣便可優游以待喬遷濟上地衝

屬狹事簡費煩誠不可以久居耳汪孺老丈心道氣弟
所宿欽逢人說項固出中心聲氣之交奚必謀面哉見
時希致

與吳龍微

比來流寇縱橫幾半天下所過蹂躪靡不如意而獨不
敢窺方城一步則老公祖偉畧能陰褫其魄耳秉旄而
掃妖氛居鄉而護桑梓豪傑作用固當如是聞知廣招
才勇以備禦侮治某得一異人特獻左右高唐金振祚

乃治某理東時舊役也膂力弓馬種種絕人而機智
深遠更屬難得以之効力疆場必有可觀弟目擊其服
役勤恪知之甚真故敢道及幸進而試之當知弟言非
妄

復德州劉守

不佞雖離閨冂尚纏疚疾觸時即灑憂天之淚辭榮每
勒絕交之書當茲秋色平分應添白髮覩此月輪已滿
如覲清輝乃辱八行重之九鼎惓惓期望非所敢承竇

疊注存寧宜自外登嘉頓首附謝銘心

與孫思皇

春初與令兄別後遂病至今緣哀疚之餘神傷骨痺雖藥餌百方未奏效也近為寇警頻仍杞憂嫠恤苦緒盈襟破除無計使來開函得諸刻讀之至德可師清風并灑肅然起敬心有所感又悄然悲也語云惟孝友于兄弟是亦為政乃惟孝友斯能為政耳以門下至性凡諸設施俱以此心行之武城寧不樂有父母乎得除

書故為并州色飛數月新猷固知喜為不謬三軍中枯
未作一詩今乃為兄成一律愧未能佳聊紓中所欲言
耳拜惠之餘附以一絲引意希惟莞納為荷

與本縣王父母

河西無處不亂所隔止一衣帶水耳賊若遠來旦夕便
薄城下城守何可不加意乎賊之得計大率在用內應
而門禁稽防是今日第一義出入之間固未可聽其叢
雜無辨也但數尺土垣直須靴尖踢倒此必有兵方可

恃之無恐而猝未可得奈何日聞天津發兵數千往援
鄆勝經臨境內此天假之便也即當便宜暫留以為防
護勦捕之用一面申詳院道此應急妙著不可時刻緩
者惟老父母速圖之

與天津監軍道來公祖

久欽斗山兼蒙覆露旌旄將臨業已伏候道左以撫仰
止私懷前驅想當不遠耶頃聞景州城西妖賊競起搶
掠村落已以十數擁衆將攻城矣此地平曠無固可負

往一勦捕可立撲滅若使得一城陷一邑彼反逸我反勞
彼反固我反渙彼反為主我反為客即兵多難為力矣
或攻近而及遠或舍已而耘人此緩急安危之機間不
容髮者也適方報變而老公祖戎車南指此天亡賊而
以奇功授台臺也昔新建往撫閩軍取道吉安聞宸
濠作速急檄諸郡兵討之隨以立平成此大功今以望
之老公祖矣

又

適聞前旄已指廣川應變甚捷當機中窺足徵方畧矣此賊蜂屯方始蟻附未多以三十鐵騎臨之何異泰山壓卵第其營寨宜審虛實疑我而我勿信撓我而我勿亂嘗我餌我而我勿售厚集其勢朕絡接應而擇一熟知深淺者為之道守妖氛可立掃也尤宜分一軍於桑園河上此河雖盈盈一水而地屬扼要再遣數人一在德州一在連窩南北船隻不許往來以防東渡如此則東西不合其勢自孤而黨自散矣不然乘間思

動在在有人不早伐其謀恐又費一番剪除也奏凱在即仍疣一危以勞從者不知肯一紓左否

又

適聞捷音履齒欲折軍威大振妖氛立清數萬生靈實惟台臺留之然四處奸黨實繁有徒徘徊觀望在此一舉今而後膽自寒謀自消震懼不敢復逞矣弭腹心之患貽宗社之福此其功豈淺淺耶但巢穴雖空結聯實廣滋蔓難盡反側易生旌旄南指之後再留一軍

彈駁幾時似亦勢不容已耳如以鄒滕久在湯火士庶
望切雲寬則請轉為奏記於撫台公祖發卒來成非
特慈善後之策亦所以竟無前之烈也憑楮無任瞻
馳

與李性叅

昨諭郊遊弟極有此興奈病體支離動需人扶殊恨
濟勝無具若不時見訪猶能偃仰相對作半晌劇談耳

又

今日奉邀其說亦有五汎湖一也看殘荷二也飯後靜坐三也賞羊頭雨四也酒場納歎五也初意園中竟日頃羅君在齋中共談午膳出郊未遲耳

又

昨晚忽作嘔苦幾欲死一月靜功效固如此因患病魔侮人苦相侵陵不得已勉苦吟以勝之呻吟中成得一詩猶不脫本家腔調也

復管駟卿

別來數月殊切懷思前以長卿所迫聊作一札原知無及豈意門下記存不忘耶至勞金老之用情無已千祈致謝並為道不得已初意也聞二碑竣事約在重陽挿萸泛菊可以共賞但不佞日苦病魔肌骨盡削耑待晤言起茲沉疴耳秋風漸深惟順時善攝為囑

與李赤城

惟老長官冰壺炳照玉尺為衡人倫之鑒久為所欽仰矣日膺新命領袖冰廳以出夾袋所儲拔幽振滯獎恬

抑競培植清倫以翼持泰道非異人事也今離照當空
乾綱獨運而諸有位多名實不孚終始易數每以啟上疑
而致中格揆厥所繇亦吾衙門之恥也博採獨持歸
於公虛務令德位相配人地相稱亦何必借異代而嘆
乏材乎惟老長官熟腸正骨靜觀深而坐照明自能闡
彙征之途収連茹之效搢紳彈冠有以也弟夙附同心聞
命色喜先國家而後及私真有萬倍恒情者一片申賀
伏冀鑒涵臨啟可勝馳依

復顧濟守

燕齊接壤聲跡易通側聞臺下以霜雪之心溥為雨露十八城吏民畏而懷之如暑月含冰寒年挾纊也濯濯治績神爵五鳳豈能擅美於前哉某家德水之許何異受辱為珉耳熟神明之頌與彼河潤者同其沾濡仰光覲德躍躍神往非朝伊夕矣接書開函受冊讀之令我十五年前心事為之一快民難見德只在中蔽上下闢通無憂不治異日者鎮撫一方以此道行之有餘也

與友

弟之受蟄此君雖為綱常中其隱病而道破欵局飲恨甚深借此發機然楚事畢竟何如勦之難施則因撫之失勢由今追昔言不幸而中矣看來決裂即在目前輔臣當揆便可乘機談言微中矣預策敢言中窺先幾似可無罪天下事非無先識之患正是任怨冒忌報主為難使公道不昭何以勸天下之破私交報君國者哉造膝而語殊可動人以台意質之以為然否

與鮮石帆

猥以拙穎不合時宜數年惴惴日在人刀俎間久已束
躬待罪今幸公道昭明之日免於網羅可以安於耕鑿
但家園蕩燼骨肉摧殘羈棲他鄉欲歸無計萍蹤浪跡
不知終所税駕耳茲聞駕返里門謹此恭候起居伏惟
眠食自愛以需環召臨啟惟切瞻佇

與鄭元岳

次尾伯宗時在過從深慶淵源有自吾道不孤近來朝

政改觀保泰為亟彩鷁過江上當有商畧筆間不能盡
覩縷也日偶鄰仙相邀晤之京口裁報稽遲伏惟灼亮不

戢

與陳岵月

再披手教及疏抄兄鴻功偉伐久已入帝鑑中也忌者
阻抑掩蔽公道而今安在哉弟自放廢以來誓不遺長
安之使苟有可效如羽之言非所靳也然亦何足為鳴

呂重耶

與友

自老先生之由秉銓而當揆也敦素絲之節佐更絃之治使中外凜凜轉念戢志以奉條章主權以尊國威斯張維國有人益不其大哉而復苦心調劑隱護善類此其功在不見不聞之地仍留一二老成以衛社稷此又天下不及盡知而某私心自亮者也自顧越在放廢澤畔行吟不敢以姓名上通長安屏退之分固應爾爾且聞龍門日峻辱在知契誼當相體即託庇實宏而門外

自遠曾言此意於程長孺想當灼察不以為訝也正在
沉病就醫京口槩行謝客無所聞見忽傳怪事令人愕
然就中委曲不得而悉惟當寇亂內訌患切剝膚之時
而擎天之柱濟川之楫不以支危廈而度驚湍天下安
知所屬耶特遣急足恭行問訊今而後乃敢伸紙布悃
勞苦如常以少贖從前踈節之讐惟汪度其鑒之是荷

與孫魯山

前聞將借重憲席為之私喜未幾迴翔棘寺黃孫不由

大拜乎如翁鼎望淵猷築沙堤以待此海內之所具瞻而同心尤切切者耳比來聖治日新美政不可勝紀傳之青史以為美談中間惟大君子贊襄其造福宗社何有極也而同人之頌義又不足言矣但返正可喜保泰為艱此後惟使君子之氣常伸小人無隙可乘斯勢常居其勝而永無後患矣治抱病既久已成沉痼而目疾歷有半歲五色不辨竟成廢人萬萬不能任天下事矣老父母日切存注引掖甚殷但此病狀斷非春明物料

若勢難久置高閣惟宜養病白門清要之地斷不敢居
即將作簿書亦所不避也願求降格以遂遐志知我亦
可少亮此苦懷矣特此奉復并布腹心希惟照原不一

與友

自六月一書奉問奄忽間又秋中矣計新糧艘將抵通灣
漕事業有成勞人以告於天子矣比來聖德日新徽美
不可殫述而在太傅大拜以後輔臣以輔養君德為主
相業之光遂覺熛炳青史而最快人意者朝端穢齋割

然一洗初出茅廬之功於此為大東南諸君子無不交口稱誦而我輩舟中語自侈先見矣但秉鉞之人猶虛張捷書掩敗冒功以圖振旅還朝計其歸來此人豈復肯在人下也為社稷計不得不蚤防之別後之機此其轉闕一番利導萬代瞻仰實在此舉祖臺當用力夾持之毋忽可乎

與周

不佞以孔李之緣兼聲氣之雅精神照映非一朝夕頃

者石城得奉周旋仰見至意惓惓其所以為君國友朋
者闢切殷至令人感服不能已已頃見復社一案已入宸
鑑從前惴惴焚坑可免此禍世道入於昌明吾輩可一
意肆力學問矣再得聖心立轉五溪竄跡立召綸扉則
尤熙朝快舉幾幾望之耳彞仲還里宜促叱馭過丹陽
道上幸命一介相聞恐有心語布悰也扇頭詩悲壯何
減少陵若其關係非詩人所敢望矣容另勉和先此勒
復不一

與李赤城

昨者一介未荷汪涵方深愧恧聞彩鷗北發又以久抱沉疴奄伏牀褥未能強起面受教益亦何以為情也今日清議一線未始不昭明於士大夫間而宸衷淵微又別有主此銓地之所以難也老長官重望為中外所倚入都之時暫且靜以觀變就中默默調護善類用得一人國家即得一人之用耳此間委折頽楮難悉而止以二豎為祟致阻躬承奈之何哉緣三載行間心血已耗

又逢大戚神傷骨瘁見者驚為異物中心惴惴常恐旦夕溘先朝露一切世想灰冷盡矣一丘一壑恰為相宜已作終焉之計若云生平未有顯過難以終廢高閣亦惟投閒置散庶足補劓息別白門一席則愛我者之所以成我也都中貴游多有知之者或意狼狽未必爾爾故特布私懷於知己之前也

與張諱春公郎

不佞棲羈貧病况味無聊日惟息心禪定不敢一問戶

外久缺聞問非以疎節自甘也漳浦來南啟闢往晤每
與抵掌時事不禁歎獻聖主當陽而中外多故疆域日
削揆厥所由惟是功罪未明以致衆人抑憤如尊大人
文武壯猷力捍危邊所轄未失一城徒以僉士下石遂
致覆盆營門殞星人心痛悼使當日奸人不撓其成乘
勢直搃而左牽右制豈止深入無忌乃所謀不就至令
長驅千里如入無人今更吞并數城連陷明是議撫為
崇覆轍相尋追維前後徒有涕泗拊膺而已邇者離照

當空陰霾迅掃堯舜初心昭然布於天下連茹彙征弓
旌四出如老世翁忠孝天植當速荷環以領袖諸賢天
步多艱正需有心人共圖平定霖雨舟楫豈異人任者
而容命世竒材久伏林泉乎緇衣有懷推轂恐後如羽
之言無足為大賢重然不敢愛綿薄也令弟英姿粹抱
聰飛指日晤接間橋梓花萼英采儼然特告當事以效
揄揚矣感承惠問附以一芹申意臨楮不勝馳越

與李性參

南北遙隔信使為艱歲裏人來知將借重京兆何又不
屑就耶或以資勞深崇不欲復以簿書相頻少即曳履
徑躋卿貳耶弟久別家園已及八載今春因道路少通
將為省墓之行已理棺矣而宿春不備躊躇而止迴首
北望中夜泣零乃流寇之禍方來未已瞻烏爰止隕泪
傷心所幸聖政日新百度改觀妙有感通是可萬年耳
羈人遠懷稍釋杞人憂天之思每有嗣絕盛世之懼計
惟長伴野老詠歌聖化斷難馳驅戎旃鶴序此等苦情

見人幸一宣布某今老矣雖有報國之忠而無救時之
具即欲勉強支持而不能者耳每有書問輒復刺刺及
此語殊足自厭然骨肉之間不敢不以腹心披露也

寄黃石齋

翁兄去後時事不可言矣今日既非前日恐明年又非
復今年此堂非燕雀可處急欲圖歸奈滿朝皆互鄉人
主上孤立無依不忍恝然去國明知伴食無補然恐一
旦有事求一伴食者亦不可得耳言之潛然

與蔡

日者得覩勇畧不羣私心甚重之今登鎮特借秉麾海上其干城矣當此專閫初開應須廣諮材雋某者胸藏黄石才利青萍平居志切請纓臨陣猷堪借箸希行該府取之軍前效用自可得其一臂也

復鹽山令張

不佞三年在疚無日不病今雖離閑而沉痛削骨未能一時遽起且支離日甚見者驚非故吾世即未忘我我

已忘世但得少延殘喘長守先人墳墓足矣此外有他
想乎惟是老父母清風惠澤神慈交譽誼當盡緇衣之
好以答覆露之私乃承惠問拜命之餘附以一絲見意
希惟茹涵為荷

與甥王申之南京寄札

自從賢甥同汝母親北行中心牽掛日夜不寧十四日
聞仙遊之信痛徹心肝暈絕仆地三十八年手足雁行
一旦分張又在異鄉痛哉痛哉何能自己念賢甥至性

過人必當傷悲須當保重母過哭泣幾念廻環既痛亡者又念生者不禁一夕九廻也倉卒之間棺槨衣衾不知曾備否搜括送銀止足途中之用諸所事宜有汝父親開喪舊規然亦不能全照今當殘破之後隨時斟酌只要盡情盡禮不至簡畧足矣只恨我相隔甚遠不能飛去一行經紀寫至此腸寸寸斷矣途中仍自耽心再諭幾家丁防護一到家時急報我知使我稍放懷抱也

又

前自聞信之後悲痛之極如不欲生肝腸摧裂體中病甚嗣見超兒返棹心愈怪之恨之至見其疾勢沉重當是病隙使然但彼中無人經紀我又不能奮飛心中何以自安賢甥平日仁孝遇此大變更當節哀順變保重身體承先繼後總在一身不可不念也且平日老成謹慎言不妄發事不妄行喪完之後閉戶讀書簡用度省僕從可不憂貧矣方寸甚亂所欲言者頗多一時未能上口有所問再陸續答之

又

計汝母親喪事在即原意躬往執绋臨穴一慟比聞山東一帶饑荒異常盜賊滿路白晝殺人再四躊躇遂不敢前念我與汝母何等兄妹手足相聯垂四十年而一旦分割何以為情今當長別無奈遭際時艱南北阻絕一送之未能臨風灑泪腸安得不寸寸斷也特扶病撰完誌銘星夜馳往以不悞窀穸之期致奠另再遣人喪事匆匆勞費百端惟加意節哀珍攝是囑臨書不勝悽

愴

又

前已發誌銘去矣茲復作祭文令登軸致奠以代我柩
前之哭數行未寫萬淚齊下舉聲未號五內先摧可恨
造物不仁奪之速速而又恨時艱多難道里險阻不得
即返以盡執繩之願念之能無痛徹心髓望甥於靈前
禱祝今日遭際之苦萬不獲已不然一身不得不慮患
之深而臨穴之慟竟未能遂悠悠此恨何時已哉明春

道路稍通盜賊少靖當於墓前申意耳特再遣人歸致送此心神已隨之俱飛越矣節哀自玉再申前囑餘不盡言

又

母親大事已襄逝者已安孝子之心盡矣此後惟當勤苦讀書以作顯親揚名之事為孝之大矣憶母親當時日盼汝成立有如望歲今當讀禮轉盼從吉奮發用功正在此時然讀書一事要在明師良友兩相夾持還須

尋一有志朋友與之朝夕講貫作文使其日日精進方
可一飛沖天耳

又

前聞甥媳變故不勝悽痛今内外家事何人照管子女
呱呱誰為撫視三千里外念之輒為腸斷賢甥一人內
外繫神何以堪處也聞道路搶攘行有戒心茲特遣人
哀問望吾甥加意調攝勿損懷抱獨此一節為諄諄致
囑耳轉眼歲除天運或改凶豐治亂之數原是循環據

傳北地大雪盈尺此是好兆南中饑荒無減於北流民過江者紛紛不計其數搶攘之風日不絕聞大亂即在眼前一碗死水無處浸灌何所資而戀戀久居此哉

又

自春以來道路梗塞欲遣人而不可得不意時事遂至於此他無所繫念惟賢甥在遠迴望可勝潛然時時見之夢魂而已再則行李數月未有所寄從來費用俱靠家橐而一日斷絕遂致困乏且南中一時物價湧貴

益覺其苦支持艱難便欲思歸而歸又難安得有好情懷也

又 北京寄札

相別曾幾何時京師瘟疫盛行哭聲連屋不想有舅母之變令人痛心總緣我運命乖蹇骨肉摧殘俯仰回想起能禁涕泗傷悼乎百感交集萬念俱灰具疏請假遂欲以病本繼之疏上不允朝上夕下聖意殷惓未敢仰負只得勉強以應上命耳

又

經此大亂又感重症九死一生之餘百感悽然骨肉關懷而首在念者惟有賢甥豈不亟欲一見而第炎天遠道跋涉為難萬不勞此行也我歸志已決勢難中止晤語之日不遠矣見人來訊問近狀安善不勝忭喜此時讀書作文宜極加意距科舉之期非遙且新提學眼力極高文字須要光芒方能起眼也我蒙上眷顧屢對臣贊美誼難仰負但前病之後未曾休息元氣太虛不耐

煩勞性命為重故去志堅決審非得已耳

又

日來心緒作惡難堪其苦忽接來報不覺痛歔泣盡而
繼之血也姨母雖云抱病何遽一旦至此天乎骨肉有
數而俱就摧殘裂肝摧臆何以堪此乎近來日日圖南
止望速歸一面而竟不能待傷哉宦情益淡惟求速去
為凭棺一慟耳

又

八月初九日為賢甥生辰是日舉子鏖戰風虎雲龍千載佳會轉盼乙酉亦在不遠此際宜努力為先資也一縑聊以見意長安宦况清淡不能厚為愧耳

又

自遭骨肉之戚諸念俱灰日夜惟思歸計矣初一日忽奉上傳入閣親灑宸翰極其眷注此等恩寵臣子何以仰副也惟有盡心竭力翼戴聖明自便之圖不敢復言矣

又

綸扉特簡出自望外頂戴聖恩不敢遽爾言歸而大事不容不舉以各處告變耳凡事仗借賢甥萬萬不勞遠來叩入亥出片刻無暇苦難形容草草布復

又 盡節遺札

日日思歸而受上特簡誼不忍辭在事不滿五十日而大勢已傾力莫能挽惟有盡節以明一生忠孝耳為臣正道死無所恨留此字作別身後凡事借我骨肉不淺

也他無所言申之甥

遺言

身為大臣不能殺賊雪恥死有餘恨然力竭盡節生平忠孝自失已盡於此期上可見太祖高皇帝成祖文皇帝而已兒輩具疏上控聖明并以遺疏附奏聊見孤臣一片忠赤耳絕筆

坐卧小樓覺亦難耐故此決絕

文忠集卷十二